

## DIE AFRIKANER IN DIE JARE DERTIG: 'n DEKADE VAN TRAUMA EN SPANNING

A.J. POSTHUMA  
OKVA

Die twintigste eeu het die Afrikaner as volksgroep voor nuwe uitdagings te staan gebring. Die Britse imperiale beleid ten opsigte van die Boererepublieke was uitgewoed en 'n nuwe versoeningsbeleid is teenoor die Afrikaner veral in die twee Noordelike kolonies gevolg. Hoe moes dit verwerk word? Daar kan beweer word dat die Afrikaner se politieke beskouings vir die eerste vyftig jaar sedert 1902 oorheers was deur 'n innerlike stryd om betreffende Britse imperialisme tot rus te kom.

Die geskiedenis van Afrikanernasionalisme in die vroeg-twintigste eeu kan alleen begryp word as dit as psigologiese produk van sy negentiende eeuse ervarings gesien kan word. Die skok van vryheidsverlies het 'n diepgewortelde weersin of antipatie in Britse imperialisme tot gevolg gehad. Daarom, ten spyte van 'n grootmoedige gesindheid van die kant van Brittanje veral sedert 1906, kon Afrikanernasionalisme in sy twintigste eeuse gewaad hom net nie daartoe bring om die hand na Brittanje uit te steek nie.

Bogenoemde stelling is natuurlik nie waar van alle Afrikaners nie. 'n Beduidende groep wat agter generaal Botha en Smuts ingeval het, het inderdaad voordele in 'n groter assosiasie met die Britse Gemenebes van Nasies gesien. Im-

plisiet aan Afrikanernasionalisme was voordurend 'n dualisme; 'n stryd tussen "ware Afrikaners" en "vergewensgesindes". Die bestaan van twee Afrikanerpartye sedert 1914, naamlik die Suid-Afrikaanse Party en die Nasionale Party illustreer hierdie punt duidelik. Dit was veral in die jare dertig wat hierdie middelpuntvleitende faktor in Afrikanergeleedere tot spanning sou lei.

Die post-1902-opset in Suid-Afrika was vreemd vir die Afrikaner. Politieke partye waaraan hy nie gewoond was nie, is gevorm. Daarbenewens het die industriële omwenteling tot grootskaalse verstedeliking aanleiding gegee wat beide Blankes en Swartmense geraak het. Die transformasie van 'n agrariese na 'n industriële samelewing was omvattend, finaal en snel. Die Afrikaner se verskuiwing na die stad was 'n noodwendige gebeurtenis waaraan hy weinig kon doen. Meer nog; ten spyte van die feit dat die Afrikaner oor politieke beheer in die nuwe Unie beskik het, het die kapitaal en vaardigheid agter die verindustrialiseringsproses uitsluitlik uit Britse geldbronne gekom.

Binne drie dekades, of een mensegeslag, het die Afrikaner stadsmens geword.

Die volgende statistiek gee 'n aanduiding van die tendens van verstedeliking by die Afrikaner:

TABEL 1

PERSENTASIEVERDELING VAN DIE BLANKE PLATTELANDSE EN STEDELIKE BEVOLKING IN DIE VIER PROVINSIES VIR DIE JARE 1904, 1921, 1936 EN 1960

Jaar	KAAPROVINSIE		TRANSVAAL		O.V.S.		NATAL	
	Platte-land	Stedelik	Platte-land	Stedelik	Platte-land	Stedelik	Platte-land	Stedelik
1904	45,3	54,7	44,6	55,4	66,4	33,6	39,5	60,5
1921	42,5	57,5	36,0	64,0	58,3	41,7	26,0	74,0
1936	40,3	59,7	31,1	68,9	54,3	45,7	23,6	76,4
1960	18,2	81,8	14,7	85,3	23,6	76,4	11,3	88,7

TABEL 11

PERSENTASIE AFRIKAANSSPREKENDES VAN DIE TOTALE BLANKE STEDELIKE BEVOLKING VAN SUID-AFRIKA VIR DIE JARE 1926, 1936 EN 1960

	1926	1936	1960
Johannesburg	24,2	28,0	30,7
Kaapstad	22,7	24,1	23,3
Durban	6,4	10,0	16,3
Pretoria	38,0	61,4	74,3
Port Elizabeth	24,3	34,6	43,5
SA	40,1	41,0	55,0

Bron: Tabel I en II, E.L.P. Stals, "Die suksesvolle vestiging van die Afrikaner in die stad", Handhaaf, Jaargang 23, Nr. 6, Augustus 1986.

Die dilemma waarin die Afrikaner hom nou bevind het was dat hy nóg beheer oor die industrie nóg die mondering gehad het om op geskoolde vlak homself te handhaaf. Met die aanbreek van die jare dertig was die Afrikaner 'n verstedelike wese. Min het hulle beseft dat die volgende tien jaar vol van skokke en materiële worsteling sou wees. Dit het die Afrikaner inderdaad voor 'n vuurproef te staan laat kom.



Ten eerste was daar die grootskaalse armoede wat die Afrikaner in die stad getref het. Hulle het met die verskuiwing na die stad hoofsaaklik in die armer buurtes ingetrek, waar oorbewoning, drankmisbruik, prostitusie en werkloosheid ernstige afmetings begin aanneem het. In 1924 byvoorbeeld kon slegs 1,1% Afrikaners dit bekostig om in goeie buurtes tot woon. Sowat 56% van alle Afrikaners in die stad was tydelike huurders. Hierdie toestand het onberekenbare maatskaplike en ekonomiese ontwrigting, om van gebroke menseverhoudings en politieke wantroue nie te praat nie, tot gevolg gehad. Giliomee beskryf die toestand van die Afrikaner in Johannesburg as "’n prentjie, van ongeletterdheid, agterlikheid en ongesofistikeerdheid".<sup>1)</sup>

Dit was veral in die ongeskoolde werkskategorieë waar die Afrikaner ’n heenkome moes soek. Hier moes hy meedinging het met ongeskoolde swartarbeiders wat teen ’n laer loon deur bedrywe in diens geneem was. Deur die Wet op Myne en Bedrywe en die sogenaamde Loonwet wat in die laat-twentigs deur die Hertzog-bewind op die wetboek geplaas is, was sekere kategorieë blanke arbeiders voorlopig verseker daarvan dat hulle bloot op grond van klassifikasie as "Blank" ’n vaste minimum loon per dag kon ontvang. Daarbenewens het die staat deur die oprigting van Yskor in 1928 duisende werkers in die Pretoria-omgewing van ’n vaste inkomste verseker. Grootskaalse indiensneming in die staatsdiens, spoorweë en polisiedienste het verseker dat swak en ongekwalfiseerde Afrikaners ’n vaste loon kon verkry. Teen 1936 was byvoorbeeld 59% van die werknemers in die staatsdiens en 66% in diens van die spoorweë Afrikaanssprekend.

Ten spyte van volgehoue pogings deur die Hertzogregering om werk aan blankes te verskaf, het die Afrikaanssprekende, juis as gevolg van gebrekkige beroepsopleiding, in die dertigerjare geneig om in die laer range vas te steek. In die staatsdienssektor was middel- en topbestuursposte uitsluitlik deur Engelssprekendes beklee. Teen 1936 was 33 tot 44 hoofde van staatsdepartemente Engelssprekend. Dit was by hoë uitsondering dat ’n Afrikaanssprekende in ingenieursbedrywe homself kon vestig. Teen 1946 byvoorbeeld, was die posisie in die volgende kategorieë as volg:

PROFESSIONELE BEROEP	ENGELS-SPREKEND	AFRIKAANS-SPREKEND
Elektriese ingenieurs	1,277	156
Meganiese ingenieurs	990	93
Mynbou-ingenieurs	630	34
Struktuur-ingenieurs	35	5
Siviele ingenieurs	1,701	189
Chemiese ingenieurs	1,097	272

Bron: S. Trapido, "Political institutions and Afrikaner social structures in the Republic of South Africa", *American Political Science Review*, Vol. LV11, NR. 1, Maart 1963, p.8.

Teen 1932 het die Carnegie Ondersoek na Armoede in Suid-Afrika bevind dat soveel as 300,000 Afrikaners uit ’n totale blanke bevolking van 1,800 000 as "baie arm" beskryf kon word. Hierdie getal het baie plaasboere ingesluit wat sedert 1930 deur ’n knellende droogte tot ondergang gedwing was. Dit was die tweede groot skok wat die Afrikaner getref het. Groot dele van die Unie het geen reën sedert die somer van 1930 gehad nie. Dit was eers in 1933 wat die eerste wydverspreide reën verligting vir boere gebring het. Die volgende lyngrafiek dui die persentasie afwyking van die gemiddelde jaarlikse reënval vir die somerreënvalgebied in die geheel aan.


TABEL IV



Bron: P.D. Tyson en T.G.T. Dyer, "The predicted above-normal rainfall of the Seventies and the likelihood of droughts in the eighties in South Africa", *South African Journal of Science*, 74, 1978.

Dit was eers ná 1936 wat die persentasie reënval hoër as die gemiddelde tussen 1910 en 1977 was. Die uitwerking van ’n geografies-relevante aspek soos reën en droogte op die sosiale en ekonomiese opset van die Afrikanergemeenskap kan nouliks oorbeklemtoon word. Eén onmiddellike gevolg van die droogte was dat verstedeliking dramaties toegeneem het. Daarbenewens het finansiële depressie die Unie getref en die waarde van die Suid-Afrikaanse pond het teruggesak na ’n vlak laer as waar dit tot ná die Eerste Wêreldoorlog was. Dit het die tendens van verarming vererger deurdat pryse hoog was en geld min. Die volgende kurwe toon die daling en styging in landboupryse 1902-1945 aan:

Tabel V



Bron: N. Dryer (Red en medewerkers, *Geskiedenis vir Suid-Afrikaanse Skole St. 10*, 1987.

Teen hierdie agtergrond het politieke veranderinge in 1933-1934 plaasgevind wat ’n diepgaande uitwerking op Afrikanernasionalisme sou hê. Dit was juis die politieke vloeibaarheid en moedeloosheid wat uit die "Groot Depressie" van die vroeg-dertigs gevloei het wat ’n onmiddellike invloed op hierdie herrangskikking van die bestaande orde tot gevolg gehad het.

Vroeg in 1933 het generaal J.C. Smuts toenadering tot generaal Hertzog se Nasionale Party gesoek. Die rede vir hierdie onverwagse politieke manewer van Smuts was ’n reaksie op die terugkeer van advokaat Tielman Roos tot die aktiewe politiek en dié se eis dat beide Smuts en Hertzog agter hom moes inval om ’n nuwe regering te vorm wat die Unie uit sy ekonomiese dilemma kon help. Nóg Smuts nóg Hertzog was bereid om te deel in Roos se politieke dobbelspel. Teen Februarie 1933 het die twee generaals ten koste van Roos tot ’n politieke vergelyk gekom wat uitgeloop het op ’n koalisie-regering wat in Mei 1933 deur ’n groot meerderheid van die kiesers aanvaar is. Koalisie het spoedig ’n sukses gebyk te wees. In 1934 het dit tot die samesmelting van Smuts se Suid-Afrikaanse Party en Hertzog se Nasionale Party gelei. Die Verenigde Suid-Afrikaanse Nasionale Party het op 5 Desember 1934 tot stand gekom met Hertzog as premier en Smuts as adjunk-premier en minister van Justisie.

Die uitwerking van hierdie gebeure het traumatiese gevolge vir die Afrikaner ingehou. Dit het nie alleen tot ’n fundamentele skeiding van weë tussen Afrikaner en Afrikaner gelei nie maar inderdaad ook ’n verintensivering van Afrikanernasionalisme tot gevolg gehad. Aan die wortel van hierdie oplewing het die beskouing van ’n groep Afrikaners wat onder dr. D.F. Malan hulself in die Gesuiwerde Nasionale Party verenig het, gelê. Dié groep het ’n sterk standpunt van afskeiding en beëindiging van bande met Brittanje ingeneem.

Vir hulle, die sogenaamde "suiwer Afrikaners", was die assosiasie van Hertzog met Smuts *mutatis mutandis* ook ’n assosiasie met stedelike kapitalisme en daardeur ook met Britse imperialisme. Die Afrikaner se stryd met Hertzog het egter nie begin in 1933 nie. Onmiddellik ná die Rykskonferensie van 1926 waartydens die sogenaamde Balfourverklaring aanvaar is, het ’n onsigbare breuk tussen Hertzog en ’n groep van sy



volgeling begin ontwikkel. Dit kan toegeskryf word aan Hertzog se algehele tevredenheid met die **de facto** status van die Unie as soewereine staat wat uit eie keuse lid van die Britse Gemenebes van Nasies was. Hertzog het in onbevange terme sy respek vir die Kroon as saambindende krag betuig en sedert 1930 met toenemende geesdrif van die "beëindiging van 'n honderd jaar van stryd tussen Boer en Brit"

Volgens Hertzog was die tyd ryp dat Afrikaanssprekendes en Engelssprekendes een nasie kon word.

Hierdie standpunt van Hertzog het impliseer dat daar ruim gemeenskaplike snypunte tussen Hertzog en Smuts se politieke standpunte sou wees. Beide die generaals het die verbintenis met die Britse Gemenebes van Nasies en 'n *conditiones sine quo non* aanvaar. Dit soubeteken dat hulle in teoretiese sin, presies dieselfde ryksbeskouinge sou huldig. Ten opsigte van praktiese kwessies soos neutraliteit en sesessie het hulle ooreengekom om te verkil. 'n Vername implikasie van Hertzog se aanvaarding van die Balfourverklaring was dat republikanisme as politieke ideaal laat vaar is. Dit is egter verkeerd om die versaking van die republikeinse droom as rede vir die oplewing van Afrikanernasionalisme aan te voer. Republikanisme was nooit 'n einddoel van Afrikanerpolitiek nie. Hoogstens was dit 'n reaksie in die twee noordelike provinsies op Britse imperialisme en in die dertigerjare 'n handige slagspreuk wat Afrikanereenheid tot gevolg moes hê. Dit word bewys deur die feit dat doktor D.F. Malan, wat nooit 'n repulikein van oortuiging was nie, tog toegegee het dat Artikel 4 van die Program van Beginsels van die Gesuiwerde Nasionale Party *inter alia* sou stel dat die party hom ten doel stel "om die selfbeskikkingsreg van die Unie langs konstitusionele weg toe te pas, totdat Suid-Afrika 'n vrye en soewereine onafhanklike republiek sal wees, afgeskei van die Britse Kroon en Gemenebes..." 3

Die verwydering tussen Hertzog en baie van sy volgelingen was ook die gevolg van 'n fundamentele distansiering van 'n groep Afrikaners van die politieke beleid van versoening wat in die Unie teenwoordig was. Met die stigting van die FAK in 1929 en die Republikeinse Bond in 1930 het 'n kultuurgerigte stroming in Afrikanerpolitiek begin groei. Daar is in vertroulike kringe van die Afrikaner-Broederbond (wat in 1918 tot stand gekom het om "suiwer" Afrikanerbelange te beskerm) gefluister dat Hertzog nie met die diepste belange van die Afrikanerdom *per se* vertrou kon word nie. Daar was toenemende onrustigheid in hierdie kringe oor die konsensusbenadering van Hertzog. Toe Hertzog in 1934 wêl met Smuts geassosieer het, het die weë van die politiekgerigte Afrikaners onherroepelik geskei van dié van die kultuurgerigte Afrikaners.

Die derde trauma wat die Afrikaner in die dertigerjare moes ervaar was dat Afrikanernasionalisme in 'n *aggressiewe, ideologiese* vorm herlewe het. Die Gesuiwerde Nasionale Party het as politieke tuiste vir 'n groep gedien wat hulle self totaal losgemaak het van die hoofstroom in die Suid-Afrikaanse politiek. Worrall sê dat "in contrast to the reconciliation character of the South African political system, Afrikaner nationalism from 1934 until the early sixties formed a sub-system of the mobilisation type within the South African polity".4

In sy weerstand teen 'n assosiasie met Britse geldbelange en Britse imperialisme het die Afrikaner hom onttrek - geïsoleer - van die gemeenskap as geheel. Die *raison d'être* agter hierdie onttrekkingsimpotom was 'n vrees dat die verarmde Afrikaner in die stad uitgelewer sou word aan die Engelssprekende besittersklas en dat die Afrikaner as volks groep of ekonomiese gebied tot permanente tweederangse status gedwing sou word.

Dit was juis hierdie ekonomiese orde waaraan die Afrikaner wou ontsnap. Kapitalisme is met die Engelssprekende geassosieer en het tot 'n hernieude anti-Engelse gevoel aanleiding gegee wat daartoe gelei het dat die Herenigde Nasionale Volksparty 5 in die veertigerjare inderdaad geweier het om Engels as amptelike landstaal naas Afrikaans te erken. Gedurende die jare 1936 tot 1939 het 'n hewige anti-Joodse



gevoel opgevlam wat sy oorsprong in 'n afkeer aan kapitalisme gehad het. Afrikanernasionalisme het in sy negatiewe vorm kapitalisme as finansiële stelsel verwerp en sterk oorgeleun na sosialisme.

In sy positiewe vorm het Afrikanernasionalisme tot 'n mobilisering en organisering van Afrikanerkragte op finansiële en sosiale gebied aanleiding gegee. Met die herformulering van ekonomiese doelwitte het Afrikanernasionalisme as mikpunt gehad die opheffing van die Afrikaner uit sy armlastige situasie. 'n Rangorde van nuwe, spesifiek suiwer Afrikanerorganisasies wat die etnosentriese karakter van die Gesuiwerde Nasionale Party weerspieël het, het tot stand gekom. So is daar as ekwivalent vir Engelse of bestaande organisasies 'n Voortrekkerbeweging, Noodhulp Liga, Afrikaanse Studentebond, handelsbanke, versekeringsmaatskappye, kultuurrade, goudmynbedrywe, jeugbewegings, motorklub en nog meer gestig. Hierdie feit het op sy beurt tot die noodwendige oorbeklemtoning van 'n sogenaamde "suiwer Afrikaner"-begrip gelei wat van Afrikanernasionalisme in die dertigerjare 'n ideologie gemaak het. In sy mees ekstreme vorm kon daar na 'n Afrikanerjingoïsme verwys word.

In hierdie verband het die Afrikaanse Calvinistiese kerke en -universiteite 'n belangrike rol gespeel. Suiwer Afrikanerskap is aan 'n Calvinistiese godsbeskouing gekoppel. Filosofe aan veral die Potchefstroomse Universiteit vir Christelike Hoër Onderwys het swaar op die Nederlandse denker Abraham Kuyper geleun wat die gedagtes van soewereiniteit in eie kring verkondig het. Hiervolgens het God bepaalde sfere georden waarbinne die mens sou opereer. Hierdie ordening het ook vir volksgroepe gegeld. Die saamtrekkende kragveld van 'n bepaalde volksgroep was dus 'n noodwendige godsverordening. 'n Beklemtoning van 'n Christelike-nasionale lewens- en wêreldbeskouing het plaasgevind wat Afrikanernasionalisme 'n sterk Christelike inslag gegee het. Begrippe soos Godsvolk, roepingsbewustheid en uitverkorenes het inslag gevind wat Afrikanerkultuur 'n duidelike gedefinieerde karakter gegee het. Veral in Afrikaanse skole het onderwysers getrou en slaafs hierdie denkwyses op leerlinge afgedwing.

Hierdie suiwer Afrikaneropvatting het duidelik uitgekristalliseer in die 1938-Ossewatrek. Vir die Afrikaner sou dit die vierde trauma wees wat hy ervaar het. Wat vir sommige 'n keerpunt en steunpunt in die Afrikaner se ontwaking was, was vir ander 'n miskenning van die goeie gesindheid



wat tussen Afrikaans en Engels kon bestaan. Hoewel sommige Afrikanerhistorici in gloeiende taal die Vortrekkereeufoes as finale gestaltewording van twintigste eeuse Afrikanernasionalisme beskryf bring 'n objektiewe studie van die gebeure ook 'n ander kant na vore.

Wat oorspronklik deur die regering as 'n nasionale fees bedoel was waaraan alle Suid-Afrikane sou deelgeneem het, het uiteindelik uitgeloop op 'n demonstrasie van oordrewe nasionalisme. Op subtile wyse het die Afrikaner-Broederbond deur sy openbare kultuurarms die reëlings vir die fees tot die mate gekaap dat die regering besluit het om daaraan te onttrek. Dit was ook 'n tydperk van verwarring, verbittering en broedertwis wat die feesvierings vooraf gegaan het. In 'n poging om die verskille te heel is die verlede onbewustelik geïdealiseer. Die Eeufeesvierings het uiteindelik 'n meesleurende voelbeweging geword wat deur sommige Afrikane aangegryp is om te vergoed vir die verlies aan erkenning uit die verlede en 'n staanplek in die hede.

Wat as 'n huldebetuiging aan 'n groep mense se opofferings moes dien, het ook 'n demonstrasie van 'n anti-Engelse gevoel geword. Afrikaneropwinding het toenemend gepasseer op vermeende en werklike onregte wat deur Brittanje aan die Afrikaner toegedien is. In hierdie proses van inventarisering is Britse imperialisme as die een enkele rede vir die droewige situasie waarin die Afrikaner in die stad hom bevind het, voorgelou. Hoewel die Afrikaner as volksgroep 'n bepaalde geesteservaring gehad het, het hierdie Eeufees verhoudinge tussen Engelsman en Afrikaner gestrem.

Dit was teen die agtergrond van hierdie opwinding wat die Afrikaner sy vyfde trauma sou deurleef. Op 4 September 1939 moes die Unieparlement besluit of hulle oorlog teen Duitsland sou verklaar of nie. Die vraag het in sy diepste sin egter nie om Duitsland gegaan nie. Dit was die Unie se verhouding tot Brittanje en die Gemenebes van Nasies wat wesenlik ter sprake was. By die Afrikaner was dit nie ter sake wat die staatsregtelike of volkeregtelike verpligtinge van die Unie was nie. In sy diepste wese het dit gegaan om 'n regstelling van die onreg wat met die wending van die eeu uit die hand van Brittanje gekom het. In die golf van Afrikaneropwelling na 1938 het die oorlogsbesluit Afrikanernasionalisme diametraal teenoor Britse imperialisme te staan laat kom.

Hertzog se neutraliteitsmosie kan in die eerste plek nie as 'n Afrikanerstandpunt verklaar word nie. By hom het dit om die uitoefening van 'n bepaalde juridiese reg gegaan. Dit verklaar waarom hy 'n neutrale standpunt wou inneem maar met die verstandhouding ewenwel dat die bestaande verhoudings betrekkinge en verpligtinge tussen die Unie en Groot-Brittanje, of enige ander van die lede van die Britse Gemenebes van Nasies ... ongeskonde sal bly voortbestaan en deur die Unie gehandhaaf sal word"<sup>7</sup>

Tereg het generaal Smuts op die ondraaglikheid van so 'n benadering gewys:

"as ons die midde-weg gaan inslaan wat die Eerste Minister voorstel, dan doen ons iets en dan kies ons 'n gedragstelsel wat heeltemal onbekend is in die volkereg. Daar is nie so iets in die volkereg nie. In die oorlog is ons of 'n vriend of 'n vyand"<sup>8</sup>

In 'n ongelukkige sin het die standpunt wat generaal Smuts ingeneem het, en wat gebaseer was op volkeregtelike verpligtinge wat lede van 'n bepaalde verbond het, geblyk 'n pro-imperiale een te wees. Dit het daartoe gelei dat Smuts as pro-Engels en daarom 'n swak Afrikaner geskets is. Hertzog se standpunt het noodwendig weer op die Afrikaner 'n appèl gehad wat hom noodwendig 'n Afrikanervolksheld gemaak het. Daarom het doktor D.F.

Malan hom ook met generaal Hertzog se standpunt vereenselwig.

Hierdie verskil in standpunte het onder Afrikane ernstige verdeeldheid gebring. Sommige het generaal Smuts gesteun en onmiddellik hul bereidheid tot opoffering vir die Geallieerde saak gedemonstreer. Andere weer het vuriglik agter Hertzog en Malan ingeval en heimlik gehoop dat Duitsland korte mette van Brittanje sou maak. So sou 'n onreg herstel kon word.

Met die finale stemming het die Smutsstandpunt met 80 teen 67 geseevier en moes generaal Hertzog as Premier bedank. Die Goewerneur-Generaal het Smuts versoek om 'n nuwe regering saam te stel en op 6 September 1939 het generaal Smuts weer na 15 jaar die leiers oorgeneem. Die oorgrote meerderheid Afrikane het die gebeure as 'n oorwinning van die gees van kapitalisme en imperialisme oor nasionalisme vertolk.

Met die aanbreek van die veertigerjare was die Afrikaner as volksgroep meer as ooit verdeel. Broedertwis het opgevlam en geweld het onder die oppervlakte gesluimer. Hertzog en Malan was volkshelde en Smuts is beskryf as "handyman of the British Empire." Die spanning waardeur die Afrikaner gedurende die dertigerjare moes gaan het tot soveel agterdog en wantroue aanleiding gegee dat die eerste twee jaar na 1939 vol van politieke intriges en groepvorming sou wees. Dit was eers na 1943 wat die Afrikaner tot groot mate agter Doktor D.F. Malan sou konsolideer tot 'n magsfaktor in die Suid-Afrikaanse politiek. Die dertigerjare het egter sy merk gelaat en dit is te betwyfel of dit vandag uitgewis is.

Volgens Hertzog was die tyd ryp dat Afrikaanssprekendes en Engelssprekendes een nasie kon word.

#### A. VERWYSINGS

1. H.G. IJLIONE, "Die ontwikkeling van Afrikaner-identiteit" in H. Adam, *Afrikanermag. Opkoms en Toekoms*, p.84.
  2. P.W. Coetzer, "Koalisie In Samestelling, 1933-1934." in *Histories-kritiese studiel*" ongepubliseerde D.Phil.-proefskrif, UOVS, 1981, p.101.
  3. M.P.A. MALAN, *Die Nasionale Party van Suid-Afrika. Sy stryd en sy prestasies 1914-1964*, pp. 163-165.
  4. D.WORRAL, "Politics and Parties," in D. Worrall (Red). *South Africa Government and Politics*, p.206.
  5. Aan die einde van Januarie 1940 het generaal Hertzog en Dr. D.F. Malan 'n Parlementere Ooreenkoms aangegaan waaruit die Herenigde Nasionale of Volksparty tot stand gekom het. Die samewerking het egter slegs tot November 1940 geduur.
  6. E.P. DU PLESSIS (Samesteller), 'n *Volk staan op*, p. 92
  7. *Debatte van die Volksraad*, Deel 36, 2 September tot 5 September 1939, Kolom 25, Generaal Hertzog.
  8. *Debatte van die Volksraad*, Deel 36, Kolom 27, Generaal Smuts.
- #### B. ANDER GERAADPLEEGDE BRONNE
1. J.L. BASSON, *J.G. Strijdom. Sy politieke loopbaan van 1929 tot 1948*.
  2. J.P. BRITS, *Tielman Roos: Sy rol in die Suid-Afrikaanse politiek, 1907-1935*.
  3. W.A. DE KLERK, *The Puritans in Africa. A Story of Afrikanerdom*.
  4. A. 1890, A.L. Geyer-versameling, Vol.1, Kaapse Argiefbewaarplek.
  5. T.D. MOODIE, *The Rise of Afrikanerdom, Power, apartheid and the Afrikaner Civil Religion*.
  6. D.O'MEARA, "The Afrikaner Broederbond 1927-1948: Class vanguard of Afrikaner Nationalism", *Journal of Southern African studies*, Vol. 3, Nr. 2, April 1977.
  7. G.D. SCHOLTZ, *Hertzog en Smuts en die Britse Ryk*.
  8. G.D. SCHOLTZ, *Die ontwikkeling van die politieke denke van die Afrikaner, Deel VIII*.
  9. A.D. TURREL, "The South African Party 1932-34: The movement towards fusion", ongepubliseerde M.A.-verhandeling, Natal, 1977.
  10. N.W. STULTZ, *The Nationalists in Opposition, 1934-1948*.
  11. A.W. STADLER, "The Afrikaner In Opposition, 1910-1948", *Journal of Commonwealth Political Studies*, Vol. VII, 1969.
  12. N.G.S. VAN DER WALT, *Die Republikeinse strewe, Dryfwere en probleem binne die Suid-Afrikaanse partypolitiek, 1902-1961*.
  13. L.J. VAN DER WESTHUISEN, "Die Neutraliteitsvraagstuk as verdelingsfaktor in die Suid-Afrikaanse politiek (1933-1940), met besondere verwysing na die rol van genl. J.B.M. Hertzog," Ongepubliseerde M.A.-verhandeling, UOVS, 1984.